

Comisiwn  
Cydraddoldeb a  
Hawliau Dynol

Equality and  
Human Rights  
Commission

Rhwydweithiau, cymdeithasol  
a chydberthnasau

# Pwy ydych chi'n ei weld?

Byw gyda'n gilydd yng Nghymru



## **Canfyddiadau Allweddol**

- Ar y cyfan, mae cymdeithas yng Nghymru wedi'i hintegreiddio'n dda.
- Roedd tuedd mai pobl ifanc, y rhai a adawodd addysg yn hwyrach a'r rhai mewn grwpiau economaidd-gymdeithasol uwch oedd â'r rhwydweithiau cymdeithasol mwy amrywiol.
- Roedd y rhan fwyaf o bobl yn fodlon ar aelodau o'r teulu yn ffurfio perthynas â rhywun o gefndir ethnig gwahanol, rhywun â chrefydd wahanol, rhywun ag anabledd dysgu.
- Byddai nifer sylweddol o bobl yng Nghymru yn anfodlon pe bai aelod o'r teulu yn ffurfio perthynas â cheisiwr lloches, Teithiwr sy'n Sipsi, rhywun â chyflwr iechyd meddwl neu rywun trawsryweddol (37% neu fwy ym mhob achos).

# Rhwydweithiau cymdeithasol A chydberthnasau

## Cyflwyniad

Mae'r ddogfen hon yn canolbwyntio ar y cwestiynau a ofynnwyd i archwilio i ba raddau y mae grwpiau lleiafrifol wedi'u hintegreiddio mewn cymdeithas yng Nghymru. Y rhwydweithiau cymdeithasol a archwiliwyd oedd teulu, ffrindiau a chydweithwyr.

Roedd cwestiynau eraill yn holi sut y byddai pobl yn teimlo pe bai perthynas agos iddynt yn priodi neu'n ffurfio perthynas hirdymor â rhywun o grŵp penodol.

## Teulu a grwpiau cyfeillgarwch pobl

Ymddengys bod cymdeithas yng Nghymru wedi'i hintegreiddio'n dda. Dywedodd tua thri chwarter y boblogaeth eu bod yn adnabod rhywun a oedd:

- yn iau neu'n hŷn o 20 mlynedd neu fwy na hwy - 95 y cant.
- â chrefydd wahanol iddynt - 80 y cant
- yn dod o gefndir hiliol neu ethnig gwahanol - 77 y cant
- yn anabl - 74 y cant
- yn hoyw, yn lesbaidd neu'n ddeurywiol - 74 y cant.

Nid yw'n syndod bod y gyfran fwyaf o bobl a oedd yn adnabod rhywun a oedd ugain mlynedd yn iau neu'n hŷn na hwy, yn eu hadnabod am eu bod yn aelod o'u teulu (81 y cant). Mae'n galonogol nodi bod bron tri chwarter y boblogaeth (74 y cant) wedi dweud eu bod yn ffrindiau â rhywun o'r gwahaniaeth oedran hwn.

I bob grŵp arall y rheswm mwyaf cyffredin dros adnabod rhywun oedd cyfeillgarwch. Dengys y ffigurau canlynol ganran y boblogaeth yng Nghymru a ddywedodd eu bod yn ffrindiau â phobl o'r grwpiau canlynol:

- crefydd wahanol iddynt (64 y cant)
- cefndir hiliol neu ethnig gwahanol iddynt (60 y cant)
- yn hoyw, yn lesbaidd neu'n ddeurywiol (53 y cant)
- yn anabl (46 y cant)

**Tabl 10.1 Rhwydweithiau cymdeithasol - pawb a oedd yn adnabod rhywun o grŵp penodol**

	<i>Sylfaen heb ei phwysoli, n =</i>	<i>Sylfaen wedi'i phwysoli, n =</i>	<i>Rhywun sy'n iau neu'n hŷn na chi o 20 mlynedd (y cant)</i>	<i>Rhywun â chrefydd wahanol (y cant)</i>	<i>Rhywun o gefndir hiliol neu ethnig gwahanol i chi (y cant)</i>	<i>Rhywun sy'n anabl (y cant)</i>	<i>Rhywun hoyw, lesbaidd neu ddeurywiol (y cant)</i>
<b>Oedd, pob un</b>	<b>1,589</b>	<b>1,589</b>	<b>95</b>	<b>80</b>	<b>77</b>	<b>74</b>	<b>74</b>
Oedd, aelod o'ch teulu	1,589	1,589	81	30	14	32	15
Oedd, ffrind	1,589	1,589	74	64	60	46	53
Oedd, cydweithiwr	1,589	1,589	46	36	32	16	23
Oedd, rhywun arall	1,589	1,589	28	21	18	16	16
Na	1,589	1,589	5	18	22	26	25
Ddim yn gwybod/wedi gwrthod	1,589	1,589	*	1	*	*	1

Noder: \* yn dynodi llai na 0.5%

## **Pa fathau o bobl sy'n fwy tebygol o fod mewn grwpiau cymdeithasol amrywiol?**

Roedd 95 y cant o boblogaeth Cymru yn adnabod rhywun a oedd yn iau neu'n hŷn na hwy o 20 mlynedd. Ychydig iawn o wahaniaethau demograffig oedd rhwng y rhai a oedd yn adnabod rhywun o'r grŵp hwn a'r rhai nad oeddent yn adnabod rhywun.

O ran y pedwar grŵp arall a archwiliwyd roedd rhai gwahaniaethau gwerth eu nodi. Roedd pobl o'r grwpiau oedran iau yn fwy tebygol o fod mewn grwpiau cymdeithasol amrywiol na phobl 65 oed, h.y. adnabod rhywun a oedd:

- o grefydd wahanol - 82 y cant o bobl 16-64 oed o gymharu â 75 y cant o bobl dros 65.
- o gefndir hiliol neu ethnig gwahanol iddynt - 81 y cant o bobl 16-64 oed o gymharu â 65 y cant o bobl dros 65
- yn hoyw, yn lesbaidd neu'n ddeurywiol - 80 y cant o bobl 16-64 oed o gymharu â 51 y cant o bobl dros 65.

O fewn hynny, y grŵp oedran ieuengaf oedd mewn grwpiau cymdeithasol mwyaf amrywiol: roedd pobl 16-34 oed yn llawer mwy tebygol o adnabod pobl o'r grwpiau hyn na'r boblogaeth yn ei chyfanrwydd (gweler tabl 10.2).

Roedd unigolion nad oeddent yn wyn yn llawer mwy tebygol o adnabod pobl o gefndiroedd hiliol neu ethnig a chrefyddau gwahanol na phobl wyn Brydeinig neu Gymreig. Roedd tri chwarter neu fwy o bobl nad oeddent yn wyn yn ffrindiau â phobl o gefndiroedd ethnig gwahanol (77 y cant) neu grefyddau gwahanol iddynt hwy eu hunain (82 y cant) o gymharu â thua dau o bob tri o bobl o gefndir gwyn Prydeinig neu Gymreig (60 y cant a 64 y cant yn y drefn honno).

Dengys y canfyddiadau hyn rwydweithiau cymdeithasol mwy amrywiol, o ran ethnigrwydd a chrefydd, ymhlith pobl nad ydynt yn wyn. Fodd bynnag, mae hyn yn anochel o gofio bod oedolion nad ydynt yn wyn yn lleiafrif o boblogaeth Cymru.

Mewn gwrthgyferbyniad â hyn, roedd pobl o gefndir gwyn Prydeinig/Cymreig yn fwy tebygol na phobl o grwpiau ethnig nad oeddent yn wyn o adnabod pobl a oedd:

- yn anabl (74 y cant o gymharu â 64 y cant o grwpiau ethnig nad ydynt yn wyn)
- yn hoyw, yn lesbaidd neu'n ddeurywiol (74 y cant o gymharu â 58 y cant o grwpiau ethnig nad ydynt yn wyn)

O ran dosbarth, gwelwyd gwahaniaeth clir iawn gyda'r rhai o ddsbarth cymdeithasol DE<sup>1</sup> a oedd yn llawer llai tebygol o fod yn rhan o rwydweithiau cymdeithasol amrywiol na'r cyfartaledd. Roeddent yn llai tebygol o adnabod pobl a oedd:

- o grefydd wahanol iddynt hwy (roedd 72 y cant o oedolion o gartrefi DE yn adnabod rhywun o'r grŵp hwn o gymharu ag 80 y cant o'r boblogaeth gyffredin)
- o gefndir hiliol neu ethnig gwahanol iddynt (65 y cant o gymharu â 77 y cant o'r boblogaeth gyffredinol)
- yn anabl (67 y cant o gymharu â 74 y cant o'r boblogaeth gyffredinol)
- yn hoyw, yn lesbaidd neu'n ddeurywiol (64 y cant o gymharu â 74 o'r boblogaeth gyffredinol).

Mewn gwrthwynebiad â hynny, roedd oedolion mewn cartrefi gradd gymdeithasol AB yn llawer mwy tebygol o gymysgu â phobl o gefndiroedd ethnig neu grefyddol gwahanol iddynt hwy eu hunain na'r boblogaeth gyffredinol. Roedd 86 y cant o oedolion AB yn adnabod pobl a oedd yn dod o gefndir ethnig gwahanol iddynt hwy ac roedd 90 y cant yn adnabod rhywun o grefydd wahanol iddynt, o gymharu â 77 y cant ac 80 y cant o'r boblogaeth gyffredinol yn y drefn honno.

Yn gysylltiedig â dosbarth cymdeithasol, roedd y rhai a orffennodd eu haddysg yn 19 oed neu'n hŷn yn fwy tebygol o adnabod pobl o gefndiroedd ethnig neu grefyddol gwahanol iddynt hwy eu hunain neu adnabod pobl a oedd yn hoyw, yn lesbaidd neu'n ddeurywiol na'r cyfartaledd. Dangosir y canlyniadau hyn yn nhabl 10.2.

Fel y gellid rhagweld, roedd gan y rhai a ddywedodd y byddai'n well ganddynt fyw mewn ardal gyda gwahanol fathau o bobl rwydweithiau cymdeithasol ehangach na'r rhai a ddywedodd y byddai'n well ganddynt fyw mewn ardal lle roedd y rhan fwyaf o bobl yn debyg iddynt hwy. Roedd y grŵp olaf yn fwy tebygol o adnabod:

---

<sup>1</sup> Gweithwyr llaw lled-grefftus a di-greffft neu sy'n cael budd-daliadau/sy'n ddi-waith

- rhywun o grefydd wahanol (89 y cant o gymharu â 76 y cant o bobl y byddai'n well ganddynt fyw mewn ardal gyda gwahanol fathau o bobl)
- rhywun o gefndir ethnig gwahanol iddynt hwy (88 y cant o gymharu â 61 y cant)
- rhywun a oedd yn anabl (79 y cant o gymharu â 66 y cant)
- rhywun a oedd yn hoyw, yn lesbaidd neu'n ddeurywiol (86 y cant o gymharu â 58 y cant).

**Tabl 10.2 Rhwydweithiau cymdeithasol: Pawb a oedd adnabod rhywun ymhob grŵp unigol yn ôl is-grŵp demograffig.**

	<i>Sylfaen heb ei phwysoli, n =</i>	<i>Sylfaen wedi'i phwysoli, n =</i>	<i>Rhywun sy'n iau neu'n hŷn na chi o 20 mlynedd (y cant)</i>	<i>Rhywun â chrefydd wahanol (y cant)</i>	<i>Rhywun o gefndir hiliol neu ethnig gwahanol i chi (y cant)</i>	<i>Rhywun sy'n anabl (y cant)</i>	<i>Rhywun hoyw, lesbaidd neu ddeurywiol (y cant)</i>
<b>Cyfanswm</b>	<b>1,589</b>	<b>1,589</b>	<b>95</b>	<b>80</b>	<b>77</b>	<b>74</b>	<b>74</b>
Dynion	744	768	94	80	80	73	73
Menywod	845	821	96	81	75	75	75
Oedran:16-34	385	413	93	83	87	74	84
35-54	598	581	96	82	80	79	80
55-64	262	248	95	80	74	73	74
65+	344	347	96	75	65	67	51
Gwyn	1438	1555	95	80	77	74	74
Prydeinig/Cymreig							
Arall	151	34	91	93	88	64	58
AB	382	376	97	90	86	76	80
C1	533	538	95	83	83	77	78
C2	242	241	96	76	73	76	74
DE	428	431	94	72	65	67	64
Parhau i fod mewn addysg	**78	92	91	85	86	79	83
16 neu'n iau	638	651	95	74	70	71	68
17-18	327	334	96	81	76	76	73
19+	544	511	96	87	86	76	80
Gwahanol fathau o bobl	236	231	96	89	88	79	86
Pobl debyg	337	342	95	76	61	66	58
Dim barn bendant	1005	1005	95	80	81	76	77

Noder: \*\* yn dynodi sylfaen fach (sylfaen heb ei phwysoli llai na 100)

## Perthynas hirdymor

Roedd y cwestiwn hwn yn ymwneud ag amgylchiadau cymharol bersonol. Felly, byddem yn disgwyl iddo ddatgelu tystiolaeth o agweddau gwahaniaethol lle mae safbwyntiau o'r fath yn bodoli.

Roedd agweddau'n amrywio gryn dipyn yn dibynnu ar y grŵp dan sylw. Cyfran gymharol fach o'r boblogaeth (11 y cant neu lai) a oedd ag agweddau negyddol tuag at y rhai â chrefydd wahanol, rhywun o gefndir ethnig gwahanol neu rywun ag anabledd dysgu.


Yn achos perthynas agos mewn perthynas hirdymor â rhywun o'r un rhyw â hwy eu hunain, roedd agweddau hefyd yn gymharol gadarnhaol o gymharu â grwpiau eraill; dywedodd mwy o bobl y byddent yn fodlon yn hytrach nag yn anfodlon ar hyn. Dywedodd 53 y cant y byddent yn fodlon o gymharu â thua chwarter yr oedolion (26 y cant) a ddywedodd y byddent yn anfodlon.

Roedd safbwyntiau ynglŷn â cheiswyr lloches, Sipsiwn/Teithwyr a'r rhai â chyflwr iechyd meddwl megis sgitsoffrenia neu iselder ysbryd yn fwy cymysg. Dywedodd cyfrannau tebyg o boblogaeth Cymru y byddent yn fodlon ac yn anfodlon ar y sefyllfa. Er enghraifft:

- ceisiwr lloches - dywedodd 37 y cant y byddent yn anfodlon o gymharu â 40 y cant a oedd yn fodlon
- Sipsiwn/Teithwyr - 38 y cant yn anfodlon o gymharu â 42 y cant yn fodlon
- rhywun â chyflwr iechyd meddwl - 37 y cant yn anfodlon o gymharu â 38 y cant yn fodlon.

Fodd bynnag, roedd agweddau gwahaniaethol yn fwy amlwg tuag at bobl a oedd yn drawsryweddol. Dywedodd y gyfran fwyaf o oedolion yng Nghymru y byddent yn anfodlon pe bai perthynas agos yn ffurfio perthynas hirdymor â rhywun o'r grŵp hwn - dywedodd 45 y cant y byddent yn anfodlon o gymharu â 33 y cant a fyddai'n fodlon.

**Ffigur 10.1 Yn gyffredinol pa mor fodlon neu anfodlon fydddech pe bai perthynas agos i chi yn priodi neu'n ffurfio perthynas hirdymor â rhywun o grwpiau canlynol?**



Sylfaen: Pob ymatebwr (1,589 heb eu pwysoli; 1,589 wedi'u pwysoli).

Gofynnwyd cwestiwn tebyg ar Arolwg 2006 o Agweddau Cymdeithasol yn yr Alban, gyda'r grwpiau canlynol yn gyffredin i'r astudiaethau yng Nghymru a'r Alban:

- ceisiwr lloches
- Sipsi/Teithiwr
- rhywun o'r un rhyw â hwy eu hunain
- rhywun ag anabledd dysgu.

Yn gyffredinol, roedd oedolion yng Nghymru yn fwy tebygol nag oedolion yn yr Alban o ddweud y byddent yn fodlon pe bai perthynas agos yn priodi neu'n ffurfio perthynas hirdymor â rhywun o un o'r grwpiau hyn (gwahaniaeth o 11 pwynt canran neu fwy). Roeddent hefyd yn llai tebygol o roi barn amhendiant drwy ddweud

nad oeddent yn fodlon nac yn anfodlon (gwahaniaeth o 6 pwynt canran neu fwy). Er gwaethaf hyn, roedd y cyfrannau o oedolion yng Nghymru a'r Alban a oedd yn dweud y byddent yn 'anfodlon' ar y cwestiwn hwn yn debyg.<sup>2</sup>

Sut y mae safbwyntiau ar gydb berthnasau'n amrywio ar draws grwpiau mewn cymdeithas?

Gwelwyd rhai gwahaniaethau clir o ran agwedd yn ôl rhyw i'r tri o'r grwpiau yr holwyd yn eu cylch yn y cwestiwn hwn. Yn gyntaf, roedd dynion yn fwy tebygol o fynegi anfodlonrwydd gyda pherthynas agos yn ffurfio perthynas â rhywun o'r un rhyw na menywod (roedd 29 y cant yn anfodlon o gymharu â 23 y cant o fenywod).

Mewn gwrthgyferbyniad â hyn, roedd menywod ychydig yn fwy tebygol o ddweud y byddent yn anfodlon pe bai perthynas agos yn priodi neu'n ffurfio perthynas hirdymor â rhywun ag anabledd dysgu na dynion (13 y cant o fenywod o gymharu â 10 y cant o ddynion) neu geisiwr lloches (39 y cant o fenywod o gymharu â 34 y cant o ddynion).

Roedd rhai gwahaniaethau gwerth eu nodi rhwng teimladau pobl iau a hŷn. Roedd pobl hŷn (55 oed neu'n hŷn) yn llawer mwy tebygol o ddweud y byddent yn *anfodlon* pe bai perthynas agos yn priodi neu'n ffurfio perthynas hirdymor â rhywun o'r holl grwpiau y cyfeiriwyd atynt yn y cwestiwn hwn na phobl iau 16-54 oed (tabl 10.3).

Pobl yn y band oedran ieuengaf (16-34) oedd leiaf tebygol o fod ag agweddau gwahaniaethol, h.y. roeddent yn llai tebygol nag unrhyw grŵp oedran arall o ddweud y byddent yn anfodlon pe bai perthynas agos neu ffrind yn priodi rhywun:

- â chyflwr iechyd meddwl - 23 y cant o gymharu â 30 y cant o bobl 35-54 oed, 48 y cant o bobl 55-64 oed a 58 y cant o bobl 65 oed a hŷn
- sydd o'r un rhyw â hwy eu hunain - 11 y cant o gymharu â 18 y cant, 33 y cant a 52 y cant yn y drefn honno
- sydd ag anabledd dysgu - 1 y cant o gymharu â 6 y cant, 22 y cant a 26 y cant yn y drefn honno.

---

<sup>2</sup> Dylid trin y gwahaniaethau hyn yn ofalus o gofio bod y ddau arolwg wedi defnyddio dulliau gwahanol.

Roedd y rhai a orffennodd eu haddysg yn 16 oed neu'n iau yn fwy tebygol na'r cyffredin o ddweud y byddent yn anfodlon pe bai perthynas agos yn priodi neu'n ffurfio perthynas hirdymor â rhywun o saith o'r wyth grŵp yr holwyd yn eu cylch yn y cwestiwn hwn. Yr unig grŵp lle nad oedd y gwahaniaeth hwn yn amlwg oedd 'rhywun â chefnidir crefyddol gwahanol'. Roedd y gwahaniaethau sylweddol ar gyfer y saith grŵp arall fel a ganlyn:

- rhywun sy'n drawsryweddol - dywedodd 52 y cant y byddent yn anfodlon o gymharu â 45 y cant o'r boblogaeth gyffredinol
- Sipsi/Teithiwr - 43 y cant o gymharu â 38 y cant o'r boblogaeth gyffredinol
- ceisiwr lloches - 44 y cant o gymharu â 37 y cant o'r boblogaeth gyffredinol
- rhywun â chyflwr iechyd meddwl - 44 y cant o gymharu â 37 y cant o'r boblogaeth gyffredinol
- rhywun o'r un rhyw â hwy - 31 y cant o gymharu â 26 y cant o'r boblogaeth gyffredinol
- rhywun ag anabledd dysgu - 14 y cant o gymharu â 11 y cant o'r boblogaeth gyffredinol
- rhywun o gefndir ethnig gwahanol - 12 y cant o gymharu ag 8 y cant o'r boblogaeth gyffredinol.

O ran ethnigrwydd, roedd pobl o gefndir gwyn Prydeinig/Cymreig yn fwy tebygol na phobl o grwpiau ethnig o ddweud y byddent yn anfodlon pe bai perthynas agos yn priodi:

- Sipsi/Teithiwr (roedd 38 y cant yn anfodlon o gymharu â 27 y cant o bobl o gefndiroedd ethnig nad ydynt yn wyn)
- ceisiwr lloches (37 y cant o gymharu ag 20 y cant o bobl o gefndiroedd ethnig nad ydynt yn wyn).

Fodd bynnag, pan holwyd yn fwy cyffredinol ynglŷn â pherthynas agos yn priodi â rhywun o gefndir ethnig gwahanol iddynt hwy, ni welwyd gwahaniaethau rhwng teimladau pobl wyn Brydeinig neu Gymreig ac oedolion nad oeddent yn wyn.

Mewn gwrthgyferbyniad â hyn, roedd pobl o gefndiroedd ethnig nad oeddent yn wyn yn fwy tebygol o fod ag agweddau gwahaniaethol tuag at ddyinion hoyw a menywod lesbaidd nag oedolion gwyn Prydeinig/Cymreig. Dywedodd pedwar o bob deg (40 y cant) y byddent yn anfodlon pe bai perthynas agos yn ffurfio

perthynas hirdymor â rhywun o'r un rhyw â hwy o gymharu â 25 y cant o bobl wyn Brydeinig neu Gymreig.

O ran crefydd, roedd Cristnogion yn llawer mwy tebygol o ddweud y byddent yn anfodlon pe bai perthynas agos yn priodi neu'n ffurfio perthynas hirdymor â rhywun o'r holl grwpiau yr holwyd yn eu cylch yn y cwestiwn hwn ond un na phobl heb grefydd. Nid oedd Cristnogion yn fwy tebygol o fod yn anfodlon pe bai perthynas agos yn ffurfio perthynas â rhywun â chyflwr iechyd meddwl na phobl heb grefydd (tabl 9.3).

Fel y gellid disgwyl, roedd pobl a ddywedodd y byddai'n well ganddynt fyw mewn ardal gyda mathau tebyg o bobl yn fwy tebygol o ddweud y byddent yn anfodlon pe bai perthynas agos yn ffurfio perthynas hirdymor gyda phob un o'r grwpiau yr holwyd yn eu cylch yn y cwestiwn hwn na phobl y byddai'n well ganddynt fyw mewn ardal gyda sawl math gwahanol o bobl. Dangosir y ffigurau yn 10.3.

**Tabl 10.3 Yn gyffredinol pa mor fodlon neu anfodlon fydddech chi pe bai perthynas agos i chi yn priodi neu'n ffurfio perthynas hirdymor â ....? Pawb a ddywedodd eu bod yn anfodlon neu'n anfodlon iawn yn ôl is-grŵp demograffig**

	<i>Sylfaen heb ei phwysoli, n =</i>	<i>Sylfaen wedi'i phwysoli, n =</i>	<i>Rhywun sy'n drawsrywedol (y cant)</i>	<i>Sipsi/Teithiwr (y cant)</i>	<i>Ceisiwr lloches (y cant)</i>	<i>Rhywun â chyflwr iechyd meddwl (y cant)</i>	<i>Rhywun o'r un rhyw â hwy eu hunain (y cant)</i>	<i>Rhywun ag anabledd dysgu (y cant)</i>	<i>Rhywun o gefndir ethnig gwahanol (y cant)</i>	<i>Rhywun o grefydd wahanol iddynt (y cant)</i>
<b>Cyfanswm</b>	<b>1589</b>	<b>1589</b>	<b>45</b>	<b>38</b>	<b>37</b>	<b>37</b>	<b>26</b>	<b>11</b>	<b>8</b>	<b>8</b>
Dynion	744	768	47	37	34	35	29	10	8	7
Menywod	845	821	44	38	39	38	23	13	8	8
Oedran:										
16-34	385	413	33	27	29	23	11	1	2	4
34-54	598	581	39	31	32	30	18	6	3	6
55-64	262	248	54	45	42	48	33	22	15	13
65+	344	347	66	56	50	58	52	26	18	13
Gwyn Prydeinig / Cymreig	1438	1555	45	38	37	37	25	11	8	8
Arall	151	34	48	27	20	34	40	13	9	11
AB	382	376	48	38	33	37	26	12	7	8
C1	533	538	41	33	31	32	22	8	6	7

C2	242	241	41	37	38	38	23	11	10	8
DE	428	431	50	42	45	42	31	16	10	9
Parhau i fod mewn addysg	**78	92	35	34	30	19	12	*	1	2
16 neu'n iau	638	651	52	43	44	44	31	14	12	9
17-18	327	334	43	40	38	34	25	12	7	8
19+	544	551	41	30	27	32	22	9	5	7
Cristion	1123	1144	49	40	40	38	30	12	9	9
Crefydd arall	103	56	37	22	24	29	24	13	5	4
Dim crefydd	349	375	36	32	29	34	15	8	5	4
Gwaha nol fathau o bobl	236	231	36	25	26	27	17	8	1	5
Pobl debyg	337	342	68	60	61	53	48	22	24	18
Dim barn bendan t	1005	1005	40	33	31	34	20	9	4	5

Noder: \* Llai na 0.5 y cant. \*\* yn dynodi sylfaen fach (sylfaen heb ei phwysoli llai na 100)

## **Sut y mae safbwyntiau ar gydberthnasau'n amrywio ar sail adnabyddiaeth o grwpiau penodol?**

Mae canfyddiadau'r arolwg yn cefnogi'r farn bod pobl yn llai tebygol o fod ag agweddau gwahaniaethol tuag at bobl o grwpiau sy'n wahanol i'r grwpiau eu hunain os ydynt yn adnabod pobl o'r grwpiau hynny. Lle bu cymhariaeth uniongyrchol yn bosibl, roedd pobl a ddywedodd eu bod yn adnabod rhywun a oedd yn perthyn i grŵp penodol yn llai tebygol na phobl nad oedd ganddynt farn wahaniaethol ar aelod o'r teulu yn datblygu perthynas â hwy.

Roedd tri grŵp y cyfeiriwyd atynt ar y cwestiwn ynglŷn â chydberthnasau hirdymor a'r cwestiwn ynglŷn â rhwydweithiau cymdeithasol, a wnaeth gymhariaeth uniongyrchol yn bosibl<sup>3</sup>. , sef

- rhywun o gefndir hiliol neu ethnig gwahanol
- rhywun â chrefydd wahanol iddynt hwy
- rhywun a oedd yn hoyw, yn lesbaidd neu'n ddeurywiol.

Roedd y rhai a ddywedodd eu bod yn adnabod rhywun o bob un o'r grwpiau hyn yn llai tebygol o ddweud y byddent yn anfodlon pe bai perthynas agos yn priodi neu'n ffurfio perthynas hirdymor â rhywun o'r cefndir hwnnw na phobl na ddywedasant hynny. Roedd y gwahaniaeth hwn fwyaf amlwg mewn agweddau tuag at gydberthnasau hirdymor rhwng parau o'r un rhyw. Roedd y rhai a oedd yn adnabod rhywun a oedd yn hoyw, yn lesbaidd neu'n ddeurywiol 34 pwynt canran yn llai tebygol o ddweud y byddent yn anfodlon pe bai perthynas agos yn priodi neu'n ffurfio perthynas hirdymor â rhywun o'r un rhyw. Felly, mae'r canfyddiadau'n awgrymu y gallai adnabod rhywun o'r grŵp hwn "beri i bobl beidio â chael agweddau gwahaniaethol ar sail tueddfryd rhywiol".<sup>4</sup>

Mae'n ddiddorol nodi bod y gwahaniaeth hwn yn llawer llai amlwg o ran crefydd, er bod y gwahaniaeth yn ystadegol arwyddocaol o hyd. Roedd y rhai a oedd yn adnabod rhywun o grefydd wahanol iddynt hwy eu hunain ond yn 6 pwynt canran yn llai tebygol o ddweud y byddent yn anfodlon pe bai perthynas agos yn priodi neu'n ffurfio perthynas hirdymor â rhywun o grefydd wahanol na'r rhai nad oeddent yn adnabod rhywun o'r grŵp hwn.

---

<sup>3</sup> Oherwydd cyfyngiadau o ran amser yn yr arolwg, nid oedd yn bosibl cynnwys yr un wyth grŵp ym mhob cwestiwn

<sup>4</sup> Bromley et al (2007), *Attitudes to Discrimination in Scotland: 2006*, Scottish Centre for Social Research, t19.

**Tabl 10.4 Yn gyffredinol pa mor fodlon neu anfodlon fydddech pe bai perthynas agos i chi yn priodi neu'n ffurfio perthynas hirdymor â....? Pawb a ddywedodd eu bod yn anfodlon neu'n anfodlon iawn yn ôl adnabyddiaeth o grwpiau.**

	Sylfaen heb ei phwysoli, n =	Sylfaen wedi'i phwysoli, n =	<i>Rhywun o gefndir ethnig gwahanol (y cant)</i>	<i>Rhywun o'r un rhyw â hwy eu hunain (y cant)</i>	<i>Rhywun o grefydd wahanol iddynt (y cant)</i>
Cyfanswm	1589	1589	8	26	8
Oedd, yn adnabod rhywun o'r grŵp hwn	1589	1589	5	17	7
Na	1589	1589	17	51	13
Gwahaniaeth	-	-	12	34	6

## Crynodeb

Roedd gan o leiaf dri chwarter o oedolion yng Nghymru gysylltiadau cymdeithasol a oedd yn cynnwys pobl a oedd:

- yn iau neu'n hŷn o 20 mlynedd neu fwy na hwy
- rhywun â chrefydd wahanol iddynt hwy
- yn dod o gefndir hiliol neu ethnig gwahanol iddynt hwy
- yn anabl
- yn hoyw, yn lesbaidd neu'n ddeurywiol.

Mae'n galonogol bod bron hanner y boblogaeth neu fwy wedi dweud bod rhywun o un o'r grwpiau hyn yn gyfaill iddynt.

Pan holwyd pobl sut y byddent yn teimlo pe bai perthynas agos iddynt yn priodi neu'n ffurfio perthynas hirdymor â rhywun o grŵp lleiafrif penodol, roedd y canlyniadau yn amrywio eithaf tipyn yn dibynnu ar y grŵp dan sylw.

O ran pedwar o'r wyth grŵp, roedd oedolion yng Nghymru ag agweddau gwahaniaethol yn y lleiafrif, gyda mwy o bobl yn dweud y byddent yn fodlon pe bai perthynas agos yn priodi neu'n ffurfio perthynas hirdymor â rhywun o bob un o'r grwpiau nag a fyddent yn anfodlon, fel a ganlyn:

- rhywun o gefndir ethnig gwahanol
- rhywun o grefydd wahanol iddynt hwy
- rhywun ag anabledd dysgu
- rhywun o'r un rhyw â hwy eu hunain.

Roedd safbwyntiau ynglŷn â cheiswyr lloches, Sipsiwn/Teithwyr a'r rhai â chyflwr iechyd meddwl yn llai cadarnhaol, gyda chyfrannau tebyg o oedolion yn dweud y byddent yn fodlon neu'n anfodlon. Roedd agweddau gwahaniaethol yn fwy amlwg tuag at bobl a oedd yn drawsryweddol: roedd oedolion yng Nghymru yn fwy tebygol o fod yn anfodlon nag yn fodlon pan ofynnwyd iddynt ddychmygu eu hymateb pe bai perthynas agos yn ffurfio perthynas hirdymor â rhywun o'r grŵp hwn.

Dangosodd y canlyniadau lle roedd cymhariaeth uniongyrchol yn bosibl, fod pobl a oedd yn adnabod rhywun o un o'r grwpiau yr ymchwiliwyd iddynt yn llai tebygol o fod ag agweddau gwahaniaethol tuag at eu teulu yn datblygu cydberthnasau ag unigolion o'r grŵp hwnnw. Roedd pobl a oedd yn adnabod rhywun o gefndiroedd ethnig neu grefyddol gwahanol, neu a oedd yn adnabod pobl a oedd yn hoyw, yn lesbaidd neu'n ddeurywiol yn llai tebygol o ddweud y byddent yn anfodlon pe bai perthynas agos yn priodi â rhywun o'r grwpiau hyn na'r rhai nad oeddent yn adnabod rhywun o'r grwpiau hyn. Mae hyn yn tanlinellu manteision cadarnhaol rhwydweithiau cymdeithasol amrywiol.

## **Nodiadau**

Mae rhagor o wybodaeth am yr ymchwil ar gael ar dudalennau'r Comisiwn yng Nghymru ar ein gwefan yn:

[www.equalityhumanrights.com](http://www.equalityhumanrights.com)

## **Ynglŷn â'r arolwg o agweddau**

Comisiynodd y Comisiwn Cydraddoldeb a Hawliau Dynol yng Nghymru GfK NOP i ymgymryd ag ymchwil i agweddau pobl tuag at wahaniaethu, hawliau dynol a chydlyniant cymdeithasol yng Nghymru. Mae'r ymchwil yn ceisio archwilio agweddau pobl tuag at wahaniaethu o ran rhyw, grwpiau lleiafrifoedd ethnig, pobl anabl, dynion hoyw a lesbiaid, materion o ran oedran, crefydd a ffydd a hefyd y Gymraeg. Mae'r canlyniadau hyn yn rhoi mesur sylfaenol o agweddau y gellid eu mesur eto yn y dyfodol.

Roedd y sampl yn cynnwys 1,589 o ymatebwyr. Cynhaliwyd yr arolwg dros y ffôn. Cafodd pob ymatebwr y dewis o gwblhau'r arolwg yn Gymraeg. Ymdriniwyd â materion o ran mynediad drwy gynnig y cyfle i ddefnyddio gwasanaeth TypeTalk i'r rhai â nam ar y clyw. I'r rhai a gafodd anhawster i gyfathrebu yn Saesneg cynigiwyd y cyfle i ddefnyddio Llinell Iaith i gyfieithu'r cyfweiliad.

Roedd y dull samplu a ddefnyddiwyd yn yr arolwg yn cyfuno dewis rhifau drwy Ddeialu Digidau ar Hap (RDD) a defnyddio cwotas i reoli proffil y rhai a gymerodd ran yn yr arolwg. Pennwyd cwotâu yn ôl rhanbarth yng Nghymru (pum rhanbarth), yn ôl rhyw ynghyd â statws gwaith, yn ôl band oedran ac yn ôl tarddiad ethnig yn seiliedig ar wybodaeth ddemograffig a gafwyd o Gyfrifiad 2001. Pennwyd y rhain i sicrhau y byddai'r sampl yn gynrychioliadol o boblogaeth Cymru yn ôl y ffactorau hyn.

Hybwyd cyfweiliadau mewn ardaloedd lle roedd cyfran uwch o bobl o leiafrifoedd ethnig yn y boblogaeth.

## **Cymharu â'r Alban a Phrydain Fawr**

Cymharwyd y canfyddiadau ag Arolwg 2006 o Agweddau Cymdeithasol yn yr Alban a'r archwiliad o ganfyddiadau a gynhaliwyd gan GfK NOP. Dylid nodi mai dim ond cymharu'n fras y gellir ei wneud am fod methodolegau gwahanol wedi'u defnyddio yn y ddau arolwg hyn. Felly, mae'n rhaid trin unrhyw debygolrwydd neu wahaniaeth rhwng canfyddiadau'r arolygon hyn a chanlyniadau arolwg y Comisiwn Cydraddoldeb a Hawliau Dynol yng Nghymru fel rhai dangosol yn hytrach na rhai absoliwt.